

Uunga siunnersuut: Akileraaruserinermik ingerlatsineq pillugu Inatsisartut inatsisaata allanngortinneqarneranik Inatsisartut inatsisaat

(Aningaasaqarnermut Nunamullu Namminermut Naalakkersuisoq)

Saqqummiussissut

(Aningaasaqarnermut Nunamullu Namminermut Naalakkersuisoq)

Siullermeerinnineq

Matumuuna Naalakkersuisut sinnerlugit akileraaruserinermik ingerlatsineq pillugu Inatsisartut inatsisaata allanngortinneqarneranik Inatsisartut inatsisissaatut siunnersuut saqqummiuppara.

Siunnersuut akunnermiliuttut akileraartussaataasullu attuumassuteqartut killeqarfinnik akimuisunik akileraartarnermi aaqqissuussinernik ilisimasaqartut nalunaaruteqarnissamik pisussaaffiat pillugu Naalakkersuisut erseqqinnerusumik maleruagassiorsinnaanerannik allannguutissanik imaqarpoq. Killeqarfinnik akimuisunik aaqqissuussinertut suliffeqarfinnik akileraartarnikkullu aaqqissuussinerit, kalaallit suliffeqarfii inuinnaalluunniit aaqqissuussatigut attaveqaatinik ilaaneri pineqarput.

Aalajangersakkat nunat tamalaat akornanni akileraartarnikkut suleqatigiinnermi, Kalaallit Nunaata suleqataaffigisaani sulianik ingerlanneqartunik aallaaveqarput. Aalajangersakkat ilanngullugu Kalaallit Nunaata inatsisitigut oqartussaarfiiit allat paasissutissanik nalunaarsuutaannik nassitsillunilu pissarsisinnaanera ajornarunnaarsippaa.

Naalakkersuisut suliamut atatillugu eqqartuussisarnermi inatsimmi eqqartuussisorisut nipangiussisussaataaerneranni pissutsit inatsimillu allannguutip uuma akornanni pissutsit soorunami isumaliutigaat, ajornartorsiutinilli taaneqartariaqartunik naammattuugaqarnatik.

Kalaallit Nunaanni aningaasarsiornikkut suliffeqarfitsigoortumillu pinerluttarnerni eqqartuussisarnerit inernerisa inatsisitigullu periuserineqartut killeqaqisut tunngavigalugit, Naalakkersuisut inatsisissatut siunnersuummi uani Europæiske Unionip nunani tamalaani periutsitigut naapertuuttut kinguneqartitsinissamik periarfissatut naliligai innersuutissallugit naapertuuttuutippaat.

Aningaasarsianik akileraarutit pillugit Inatsisartut inatsisaanni ingerlatseqatigiiffiit, ingerlatseqatigiiffinnut akileraarutaagallartunik akiliisinnaanerannik ammaassisoqarneranik inatsimmik kinguneqaataasumik aaqqiissuteqarnermik siunnersuut imaqarpoq. Siunnersuut taanna ataatsimiinnermi uani immikkoortoq 17-tut suliarineqassaaq.

Qallunaat, savalimmiormiut nunanilu allani oqartussanik paasissutissanik paarlaateqatigiinnermut malittarisassat erseqqissarneqarnerat siunnersuutip malitsigaa.

Peqatigisaanik aningaasanik malunnarunnaarsitsineq pillugu paasissutissat pissarsiarineqartut isertuullugit suliarineqarnissaat erseqqissaatigineqarpoq.

Tamatuma saniatigut nunani allani oqartussaasut meeqqanut aapparismullu akilersuutitut akiliutaasa aalajangersarneqarnissaat siunertaralugu Kalaallit Nunaanni akileraartarnermut ingerlatsivinnit aningaasaqarnermut paasissutissanik pissarsisinnaanerata tunngavissinneqarnera siunnersuutip nassataraa. Kalaallit Nunaat paasissutissanik taamaattunik paarlaassisinnaareerpoq, inatsisilli allangortinnerata Kalaallit Nunaata nunanut avannarlernut pisussaaffeqalenera malitsigaa.

Naggasiullugu inatsisissatut siunnersuut tassungalu nassuiaatit innersuussutigaaakka. Taama oqaaseqarlunga Naalakkersuisut sinnerlugit siunnersuut Inatsisartuni kajumittumik suliarineqartussanngortippara.